

[Augsburg], 21. August [1568]

An Johannes Crato von Krafftheim

UB Breslau, Ms. 9820 (Rehdigeriana 246), Nr. 353 (fol. 465r-v) (nicht eigenhändig bis auf die Adresse und die Unterschrift).

Clarissimo viro, D. Ioanni Cratoni etc. archiatro Caesareo. Domino et amico suo colendo. Wien.

S. Temporis breuitas (Nam intra horam mittendae sunt literae) et ualetudo parum commoda, me in scribendo breuiorem faciunt, alienaque manu uti cogunt. Ac de coniectationibus uel potius aberrationibus meis parum labore: modò uoluntatem Exc. tuae gratificandi mihi non defuisse intelligas. De tua autem annua reuersione idem quod et nuper, scribo: me illi soli, sine directionibus et reliquis euentuum significatoribus parum tribuere. Sed tamen nihil in ea esse puto formidabile: ac potius operas tuas medicas, et aulica ministeria fore fortunata, persuasum habeo. Sextus enim locus, etsi per se malus: medicis tamen fortunatus est: etsi Mars Venus Mercurius à septima parum absunt, inimicorum apertorum significatrice. Venus tamen mitigat Martem et Mercurius in ijs cauendis suo muneri non est defuturus, et quia coniunctio illa fit in signo Iouiali et masculo, et Iupiter fortis ac potens est, ac undecimae dominus, uidetur inimicis tuis plus esse periculi quam tibi. Luna in octaua in occasu suo, etsi bona non est: tamen non uideo, cur adeo timenda sit: Mutatio si qua inciderit: ea quid aliud erit, nisi assertio è seruitute in libertatem, diu à te expetitam? De uitae autem termino pronunciare ex reuolutione, uidetur esse friuolum. Nam si ea uis illius esset: ego anno ab hinc tertio, et aetatis uigesimo nono uiolentum interitum nequaquam euitassem: praesertim cum etiam malae directiones accederent, et periculosa itinera facienda mihi essent. Sed Deus me diutius in terris repere uoluit, et plures morbos atque molestias experiri. Atque haec de astrologicis nugis: quae si edicta essent praetoria, et non ratione atque alijs causis gubernarentur: et reuolutio huius anni, et Lunae progressio ad trigonum Veneris me cogerent anno aetatis demum tertio et quinquagesimo nouum, si Dijs placet, maritum fieri. Sed nuptias me in somnis celebraturum esse existimo: idque fortasse praestat, quam breui post, choream ducere in caemeterio. Ad typographias quod attinet, Eusebius Episcopius perbenigne mihi suam pollicetur operam: qua et uti decreui. Sed uereor ut intra annum quicquam mearum lucubrationum publicatum uideam: quod eae ab Oporini successoribus fortasse iudicio extorquendae erunt. De patrono deliberandi satis spacij est. Ac si tu censueris, alium quaerendum commentarijs in Isocratem, qui nemini inscripti sunt: praefatio ad Caesarem nihilominus sarta tecta manebit. Neque ego à Norimbergensibus recessissem, nisi insigni contemptu mei fuissem grauiter offensus.

Cornelius nondum huc redijt. Quem si uidero, causam ex eo requiram, cur, te insalutato, discesserit. Nam ingratum hominem me tibi commendasse, permoleste ferrem. De thermis Badenis ualde dubito. Nam patri quidem meo in eodem morbi genere salutares eas fuisse memini. Sed idem expertus sum, octauum iam, omnia commoda aquarum malo uino, quod iratus Bacchus mihi perpetuo ingerit, non multò post esse deleta. Catapotis terebinthinis nudius tertius sum usus: quae et heri et hodie magis commouerunt aluum, quam eo ipso die, quo hausta fuerunt. Ac hodie duriusculas προσβολὰς τῆς ἰσχιάδος sensi, quae nunc, credo extractis malis humoribus, sunt paulo meliores. Sambuco rescribo et tuae Exc. de tanto mei studio maximam gratiam habeo. Vale ac illud saepe tibi occine:

Nate Deo, quò fata trahent retrahentque sequemur:
Quicquid erit, superanda omnis fortuna ferendo est.

21. Augusti. ♀ διέποντος, ea ipsa hora qua tuas accepi.

Hiero[nymus] Wolfius
Tuus.